

## **Radyo an Norvys**

(<http://www.dasunys.net/podcast.htm>)

**Titel:** Nowodhow an seythun (09/01/08)

**Auctour:** Matthew Clarke

**Dydh:** 09 Genver 2008

**Pesyans:** 00:03:57

Tri hans person re geskerdhas an bennseythun yw passyes yn Aberfal.

Yth esens i ow sevel erbynn towlennow degea tanluva an dre y'n nos.

Yma sorr dhedha drefenn bos unn milvil peuns spenys gans an konsel war lyver-termyn rydh rag an poblek.

Dell hevel... an danluva yn Kammbromn yw salow y'n eur ma.

Yth esa sterenn bellwolok yn mysk an bush ow keskerdhes dhiworth an danluva bys yn Gwitthi an Mor Gwlasek Aberfal

Steve McFadden dhiworth Eastenders yw trigys ogas dhe Aberfal.

Ev a leveris dhyn bos edhomm dhodho a skoedhya an kaskyrgh drefenn bos y gerens selwys gans an tanlu nans yw deg blydhen.

\*\*\*\*

Dew byskador Frynkek re veudhis war arvor Kernow.

Y sedhas y'n mor ogas dhe'n Lysardh aga hokk.

Peswar esel an meni yw kellys hwath.

Unn den veu tennys mes an dowr yn fyw gans kryw askell-dro Kilros.

\*\*\*\*

Yma unn dre yn Karadon owth ombareusi rag hwarvos arbennik hevlyna.

Y fydh Kernowyon ow mos dhe Logh, an Kynnyav usi ow tos, a-dhiworth pub sorn an bys.

Hemma a vydh an tressa Dehwelans... ha restrys vydh may fo chons a bubonan mos dhe Orsedh Kernow ynwedh.

Logh yw porth pyskessa hwath y'n dydhyow ma.

Yma ordenoryon an hwarvos ow kovynn orthyn rag gweresoryon.

\*\*\*\*

Ha pyth yw an kevrenn ynter hemma...

[CLIP]

Ha hemma?

[CLIP]

An gorthyb yw, towlenn bellwolok nowydh.

Echo Beach... po Treth Dasson yn Kernewek... yw tavethlys dhe'n kynsa gweyth an seythun ma.

Settyes yw yn Kernow ha holya a wra bywnans a vagas a vordardhoryon yn tyller henwys Polnarren.

Sterenn an dowlenn yw Jason Donovan... den meur y vri wosa bos yn Neighbours nans yw ugens blydhen.

Ev a wari rann a Dhaniel Marrack... kablys yw gans tus an dre wosa droglamm skath.

Sterennow erell an dowlenn yw Ben Miller, Martine McCutcheon, ha Johnny Briggs.

\*\*\*\*

Rygbi lemmyn...

<sfx>

Ha lowender meur dhe Lannstefan wosa i dhe fetha Rotherham deg poynt erbynn seyth.

Res vydh dhedha gwaynya nebes moy hevlyna mar mynnons bos salow yn Kenedhlek Onan.

Yth esa gwayn dhe'n Vorladron keffrys.

I a dhehwelis dhiworth an Pertemps Bees wosa trygha seyth-poynt-warn-ugens dhe tri-foynt-warn-ugens.

Ha lemmyn Kenedhlek Dew... bagas Essex Southend eth tre wosa bos gweskys yn fen.

Rysrudh a waynyas dew-ugens-poynt dhe seytek.

\*\*\*\*

Ha'n mis ma a wel hwarvos arbennik a-barth Kernewegoryon.

Dy' Sadorn hweghves-warn-ugens a vis Genver a vydh Goel Genver.

An Jydh Lowender ma yw restrys yn Hel an Dre Fordh Ponsmeur ynter unnek eur ha hwegh eur.

Drewgh boes rag kevranna orth prys li.

Y fydh gwariow, donsya, klappya, bagas Skwardya, ilow dhiworth Jill Warden, bardhonieth dhiworth Pol Hodge, ha kanow gans Ken George.

Igor yw dhe bubhuni ...ha heb kost yw... byttegyns y fydh skala rag kuntell arghans profyes ...awos bos ordenys genev vy ow honan ha my a vynn kudha kostow an hel, te, ha koffi.

Hemm yw hwarvos rag Kernewek kewsys... na skrifys... ytho dewgh hag omlovenhewgh.

\*\*\*\*

Bys y'n nessa seythun... kemmerewgh with.